

INUIT ATAQATIGIIT

INATSISARTUNI



Aasiaat 01.juli 2015

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

- 1. Naalakkersuisut Kangerlussuarmiit Sisimiunut aqqusinniornissamik pilersarusiortunik imaluunniit misissuisunik ilisimasaqarpat?**
- 2. Naalakkersuisut nalunnginnerpaat qanoq akeqassagaluarnerseq Kangerlussuarmiit Sisimiunut aqqusinniortoqassagaluarpat?**
- 3. Naalakkersuisut namminneq pilersaaruteqarnerpat Kangerlussuarmiit Sisimiunut aqqusioriortoqarsinnaaneranik misissuititsinissamik?**
- 4. Naalakkersuisut Kangerlussuarmiit Sisimiunut aqqusinniortoqassagaluarpat aqqusinniassa qanoq akeqassanersaq misissuiffiqineqarnikuunersaq ilisimasaqarfigaat?**
- 5. Naalakkersuisut ilisimasaqarfiginerpaat Qeqqata Kommunea Kangerlussuarmiit Sisimiunut ATV-it aqqutigisinnaasaannik sanaartortitsiniartoq?**
- 6. Aamma Naalakkersuisut tamanna ilisimagunikku sanaartortitsineq peqataaffiginiarpat imaluunniit suleqataaffiginiarpat?**
- 7. Naalakkersuisut Kangerlussuarmiit Sisimiunut aqqusinniornissamik talittarfiit atorlugit immakut / tatsikkut aammalu nunakut aqqusinniornerit atorlugit pilersarusiortunik imaluunniit misissuisunik ilisimasaqarpat?**

(Inatsisartuni ilaasorta q Peter Olsen, Inuit Ataqatigiit)

Tungavilersuut:

Naluneqanngitsutut naalakkersuinikkut anguniakkatta ilagilluinnarpaat inuussutissarsiutitigut ineriartortitsinissaq, inuussutissarsiornikkullu ineriartortitsiniarnitsinni takornariaqartitsinermik ineriartortitsinissaq pingaartilluinnakkat ilagaat; inuussutissarsiornikkut takornariaqartitsineq sukarsuit sisamaatut aamma isigaarput.

Takornariartivittullu ineriartortitassatut piukkunnarluinnartut ilagaat Kangerlussuaq, Kangerlussuullu eqqaa taamatullu aamma Sisimiut.

Assersuutigalugu Timmisartuutiqatigiiffik Icelandair-imiit piukkunnartutut isigineqarpoq Kangerlussuaq aamma Sisimiut taakkualu aamma eqqaat.

Kangerlussuup eqqaani, Sisimiullu tungaanut aqqutaa eqqaalu takornarissanut piukkunnartorsuuvoq.

Kangerlussuup Sisimiullu akornanni aqqusinermik pilersitsisoqaraluarpat, inuussutissarsiutigalu takornariaqarnikkut pilersinneqarsinnaasut suuppat aamma suut misigineqarsinnaassappat?

Aasaanerani nunap timaannarsuani aallaarsimaarneq eqqissisimaarneq tatsini nalunnguarneq aalisarneq – eqalunniarneq - qajartorneq, uumasunillu takornarniarneq; umimmannik tuttunik ukallinik takusaqarlunilu misigisaqarneq il.il. Ukiukkut qimusserneq pisuttuaatigaluni sisoriarneq, qaqqatigut sisorarneq, snescootererneq allarpasuillu Sisimiut Kangerlussuullu akornani takornariaqarnikkut pilersinneqarsinnaapput nunatsinni allamik nunamik taama angitigisumik, periarfissagitsigisumillu peqarunangilaq.

Nunatarsuaq narlumukajaarsuaq inuppassuarnut inissaqartitsisoq, Islandimi ukiumut 1mill-nit qaangilaarlugit takornarissanik tikeraarneqartartoq, unammillersinnaassagutsigu takornariaqartitsinikkullu ineriartortitseqqissagutta taava Kangerlussuup Sisimiullu akornanni aqqusinermik pilersitsinissaq avaqqukkuminaatsorujussuanngorsimassaaq.

Taamatut tunngavilersuuteqarlunga matumuuna apeqquteqaatiga ingerlateqqippara.

Kissaatigaaralu apeqqutima ullut qulit iluanni akineqassasoq.